

## He Ngohe Aromatawai ā-Roto Mō ngā mahi whakamahere anake

**Te Ingoa o te Ngohe:** Whakapapa

**Aronga:** Toi Ataata 1.1C

**Paerewa Paetae:** Toi Ataata 1.1

**Kaupae:** 1

**Whiwhinga:** 5

### He Tohutohu mā te Ākonga

#### I tēnei ngohe

I tēnei ngohe, ka rangahau koe i ngā whakapapa o tētahi tikanga toi ataata.

#### Te horopaki

Ko tāu nā mahi he whakarite whakaaturanga mō ngā whakapapa o tētahi tikanga toi ataata.

Māu tētahi tikanga toi ataata e kōwhiri hei kaupapa rangahau māu. Kātahi ka whakarite whakaaturanga koe mō te/ngā whakapapa e hāngai ana ki taua tikanga toi.

Ka aromatawaingia tāu whakaatu māramatanga ki ngā kōrero whakapapa o tētahi tikanga toi.

#### Hei mahi

Kōwhiria tētahi tikanga toi e ngākaunuitia nei e koe. Hei tauira pea, ko te mahi tā moko, te raranga, te tāniko, te tukutuku, te kōwhaiwhai, te whakairo, te mahi pounamu, te mea, te mea.

Āta rangahaua ngā whakapapa mō taua tikanga toi. Ko ngā kōrero tērā e hāngai ana ki ngā atua, tipua, taiao, kōrero tuku iho/hītori, tae atu ki ngā kōrero katoa mō te pūtakenga mai o taua tikanga toi, kia puta ia ki te whaiao, ki te ao mārama. Ko te tūmanako ia, kia kimihia, kia rangahaua ngā kōrero nō tōu ake iwi/rohe.

Whakaritea mai tāu nā whakaaturanga. Kei a koe anō te tikanga mō te momo whakaaturanga, arā pea, he kauhau, he hopunga ataata, he whakaari, he aha atu rānei. Ko te tikanga ia, kia whakamārama, kia whakamāori atu koe i ngā whakapapa me ngā kōrero pūtake kua kitea e koe.

## Kōrero Āpiti

ariā toi ataata	<p>Ko ngā kaupapa/whakaaro/kōrero e noho ana hei tūāpapa mō tētahi mahinga/tikanga toi, i toko ake ai taua mahinga/tikanga toi.</p> <p>Hei tēnei ngohe, ko te ariā toi ataata ko ngā kōrero whakapapa mō tētahi tikanga toi</p>
tikanga toi ataata	<p>Ko ngā tikanga toi ko ngā whakaritenga mahi e whakaaetia whānuitia ana, e whāia whānuitia ana, ao hōu mai, ao tawhito mai. Kua hua mai i ngā tūhuratanga, i ngā whakamātautanga o ngā āhuatanga toi a tēnā ringatoi, a tēnā reanga, a tēnā iwi, kia poupoua ki te ao. He mea ahu mai, he mea whakaatu anō hoki i ngā ariā o te tokomaha/iwi.</p>